

आकाशवाणी

बिहार च पुख्ता सुरक्षा इंतजामें ते मतदाताएं मुआफक उपाएं बश्कार विधान सभा चुनां दे पैहले गेड़ तैहत अज्ज मतदान होआ करदा ऐ।

भारतीय नौसेना कोच्चि स्थित नौ सेना अड्डे परा इच्छक समुन्द्री जहाज औपचारिक तौरा पर अज्ज सेवा च शामिल करोग।

हिमाचल प्रदेश ते उत्तराखंड दे उच्चे पहाड़ी इलाकें च कल ताजा बर्फबारी होई जेदे कारण सैलानियें ते मुकामी लोकें च खुशी दी लैहर द्रौड़ी पेई ऐ।

अमरीकी सुप्रीम कोर्ट दे जजें राष्ट्रपति डोनाल्ड ट्रम्प आसेया अंतराष्ट्रीय आपात आर्थिक शक्ति कनून 1977 दा इस्तेमाल करियै इक तरफा शूल्क लाने दी कानूनी वैधता उप्पर सोआल पुट्टे न।

प्रधानमंत्री नरेन्द्र मोदी होरें नमीं दिल्ली लोक कल्याण मार्ग स्थित सरकारी कोठी च महिला विश्व कप विजेता खडारियें दी मेजबानी कीती।

ते चौथे टी-20 क्रिकेट मैच च भारत दा मुकाबला आस्ट्रेलिया कन्ने Queensland, दे करारा Oval मैदानें च होग।

<><><><><><>

Bihar Polls

बिहार विधान सभा चुनां दे पैहले गेड़ तैहत अज्ज मतदान होआ करदा ऐ। इस गेड़ तैहत 18 जिलें च फैली दियें 121 चुनां हलकें च वोट पोआए जागंन, जेदे च पटना, वैशाली, नालंदा, भोजपुर, मुंगेर, सारण, सिवान, बेगुसराय, लाखीसराय, गोपालगंज, मुज्जफरपुर, दरबंगा, माधेपुरा ते सहरसा शामिल न। ए मतदान बड्डलै 7 बजे शुरु होआ ते संजा 6 बजे तोड़ी जारी रौहग। उआं सुरक्षा कारणें कारण सीमरी-बख्तेयारपुर, महिशी, तारापुर, मुंगेर, जमालपुर ते 56 होरनें मतदान केन्द्रें पर मतदान संजा 5 बजे समाप्त होई जाग। आजाद, निरपक्ख ते शांतिपूर्ण चुना करोआने लेई सुरक्षा दे पुख्ता इंतजाम कीते गेदे न। चुनाएं गी सुचारु ढंगें कन्ने करोआने लेई केन्द्रीय हथियारबंद पुलिस बल ते राज्य पुलिस गी तैनात कीता गेदा ऐ। महिला सशक्तिकरण गी बढ़ावा देने लेई 926 बूथ ऐसे कायम कीते गे न जित्थे पूरी चाली महिलां कर्मियें गी तैनात कीता गया ऐ। इयां गै 107 मतदान केन्द्रें पर दिव्यांग जनें गी तैनात कीता गया ऐ। पटना च मुख्क चुनां अधिकारी दे दफ्तरै च इक विशेष नियंत्रण कक्ष स्थापित कीता गया

ऐ। मतदाता अपनी शकैतां 0612-2824001, जां फही फैक्स 0612-2215611 पर दर्ज कराई सकदे न। एदे इलावा मतदाता ceo_bihar@eci.gov.in ते ceobihar@gmail.com पर बी अपनी शकैतें गी दर्ज करी सकदे न। चुनाएं गी मतदाताएं मुआफक बनांदे होई चुनां कमीशन नै केंई उपा कीते दे न।



Navy Ikshak

भारतीय नौसेना कोच्चि स्थित नौसेना अड्डे पर “इक्षक” जहाज गी औपचारिक तौरा पर अज्ज सेवा च शामिल करोग। इस जहाज गी पानी च तोआरने आहले समारोह च नौसेना प्रमुख दिनेश के. त्रिपाठी होर बी मजूद रौहगंन। रक्षा मंत्रालय नै दस्सेया ऐ जे सर्वेक्षण पोत श्रेणी दे त्रिए ते दक्खनी नौसेना कमान च तैनात होने आहले पैहले पोत कन्नै, “इक्षक” भारतीय नौसेना दी जल सर्वेक्षण क्षमताएं गी बदाग।



Snowfall

हिमाचल-प्रदेश ते उत्तराखंड दे उच्चाई आहले इलाकें च कल बर्फबारी होई जेदे कन्नै मुकामी लोकें ते सैलानियें गी बड़ी मती खुशी होई ऐ। हिमाचल-प्रदेश दे आदिवासी जिले लाहौल, स्पीति, किन्नौर ते कुल्लू दे ऊंचाई आहले इलाकें ते पहाड़ी दर्जें च ताजा बर्फबारी होई, जेदे कन्नै तापमान च गिरावट आई ऐ ते आले-दोआलें दिएं घाटियें च ठंड बदी गई ऐ। उत्तराखंड च बद्रीनाथ दे उच्चाई आहले इलाकें च कल बरखा ते बर्फबारी होई जेदे चलदे चमोली ते रुद्रप्रयाग जिलें दे किश हिस्सें च तापमान च गिरावट आई। बद्रीनाथ च मंगलवारें हल्की बरखा होई ही ते कल संजा बद्रीनाथ च हल्की बर्फबारी बी होई।



Weather

जम्मू-कश्मीर दे बक्ख-बक्ख इलाकें च हलके कोला दरमेयाने दर्जें दी बरखा ते किश उप्परलिए धारें पर बर्फबारी दे बाद मकामी मौसम विभाग नै अज्ज कोला लेइयें 16 नवम्बर तोड़ी लगभग पूरे जम्मू-कश्मीर च मौसम आम तौरा पर खुशक रौहने दी पेशगोई कीती ऐ। आकाशवाणी दे जम्मू संवाददाता नै दस्सेया ऐ

जे अज्ज कोला लेइयै 19 नवम्बर तोड़ी मौसम आम तौरा पर खुशक रौहने दी भविक्खवाणी मगरा केन्द्र शास्त प्रदेश दे करसानें दना राहत महसूस कीती ऐ कीजे हून उनेंगी फसलें दी बाहड्डी ते होरनें कम्में गी लेइयै कोई चिंता नैई ऐ ते ओ अपनियां गतिविधियां जारी रखी सकदे न। मौसम विभाग नै 17 ते 18 तरीक गी मौसम इक बारी परतियै बदलोखड़ा रौहने दे आसार दस्से न पर कुसे भारी बरखा जा बर्फबारी दी कोई संभावना नैई ऐ।

<><><><><><>

US Supreme Court

अमरीका दी सुप्रीम कोर्ट नै राष्ट्रपति डोनाल्ड ट्रम्प हुंदे आस्सेया लाए गेदे वैश्विक टैरिफ दी कनूनी वैधता पर बहस शुरु करी दिती ऐ। बरे च सब्भनें थवां महत्वपूर्ण आर्थिक मामलें चा इक एह मामला तय करोग जे राष्ट्रपति ट्रम्प होरें अपनी शक्तियें दे अंदर कम्म कीता यां फही कर लाने दे कांग्रेस दे अधिकार दा अतिक्रम कीता। केई सारे लौहके कारोबारियें ते राज्यें दे इक समूह नै इस टैरिफ गी गैर कनूनी दस्सदे होई चुनौती दिती ही।

<><><><><><>

PM -Amul

प्रधानमंत्री नरेन्द्र मोदी होर भारत दी अगुवाह सहकारी संस्थाएं अमूल गी वैश्विक सहकारी समीतियें दी रैंकिंग च पैहली थाहर ते IFFCO गी दुई थाहर हासिल करने पर बधाई दिती ऐ। सोशल मीडिया दी इक पोस्ट च मोदी होरें आखेया जे भारत दा सहकारी क्षेत्र जीवंत ऐ ते केई लोकें दे जीवन च बदलाव आना'रदा ऐ। उ'नें आखेया जे सरकार औने आहले समें च इस क्षेत्र गी होर बी मता प्रोत्साहित करने आस्तै केई गें पुट्टा रदी ऐ।

<><><><><><>

PM -Vande Matram

प्रधानमंत्री नरेन्द्र मोदी होर राष्ट्रीय गीत “वंदे मातरम” दे डेढ़ सौ बरे सपूरे होई जाने दे मौके पर कल नमीं दिल्ली च साल भर चलने आले समारोह दा उदघाटन करगंन। इस समारोह दा आयोजन संस्कृति मंत्रालय आसेया कीता

जा'रदा ऐ। ए राष्ट्रव्यापी समारोह अगले बरे 7 नवम्बर तोड़ी जारी रौहग। एदी मंजूरी केन्द्रीय मंत्रीमंडल नै पिच्छले महीने दी पैहली तरीक गी दिती ही।



PM Women Cricket

प्रधानमंत्री नरेन्द्र मोदी हों कल लोक कल्याण मार्ग स्थित अपने आवास पर महिला विश्व कप विजेता खडारियें दी मेजबानी कीती। मोदी हों महिला क्रिकेट टीम गी उंदी जित पर बदाई दिती ते टूर्नामेंट च उन्दी शानदार वापसी दी सराहना कीती। प्रधानमंत्री हों खडारियें सोया **फिट इंडिया** दे सनेह गी अग्गे बदाने दा आग्रह कीता। मोदी हों obesity दी बददी समस्या पर बी चर्चा कीती। उनें फिट रौहने दे महत्व पर लौ पाई। कप्तान हरमन प्रीत कौर हों 2017 च मोदी हुंदे कन्ने होई दी मलाटी गी चेता कीता, जिसलै ओह ट्रॉफी बगैर गै उन्दे कन्ने मिलियां हियां।



Jammu Sgr.Rail

जम्मू-कश्मीर च रेल-सम्पर्क दे क्षेत्रे च हासल उपलब्धियें च होर मता बाददा दर्ज करने दे मकसद कन्ने उत्तरी रेलवे नै जम्मू डिविजन च विकास कारवाइयें ते पुर्नविकास दे कम्में च मती तेजी आंदी ऐ, तां जे जम्मू ते श्रीनगर बश्कार सिद्धा रेल सम्पर्क बनी सकै। आकाशवाणी दे जम्मू संवाददाता नै जानकारी दिती ऐ जे ओ रेल गड्डियां जेहडियां एल्लै छड़ा कटड़ा ते श्रीनगर बश्कार चलै कर'दियां न, ओ हून तौले गै जम्मू रेलवे स्टेशन थमां चलना शुरु होई जाहगंन। रेलवे दे इक सीनियर अफसर नै जानकारी दिती ऐ कि श्रीनगर ते जम्मू बश्कार सिद्धा रेल-सम्पर्क जकीनी बनाने लेई सोच-विचार चलै करदा ऐ। एहदे लेई जम्मू स्टेशन पर पटरी बछाने सरबंधि कम्म लगभग पूरा होई चुके दा ऐ जिसलै कि बाकी सार्वजनिक ढांचा जियां कि नमें प्लेटफार्म ते स्टेशन पर होर दुइयां सुविधा बी लगभग मुकम्मल होने दे कोलकाल न।



Cricket

मर्दे दे क्रिकेट च भारत अज्ज आस्ट्रेलिया दे क्वींस-लैंड स्थित कैरारा ओवल च 5 मैचें दी श्रृंखला दे चौथे टी-20 मैच च आस्ट्रेलिया कन्नै खेडोग। एह मैच भारतीय समें मूजब दपैहरी पौने 2 बजे शुरु होग। होबार्ट च त्रिए टी-20 अंतराष्ट्रीय मैच च भारत आसेया आस्ट्रेलिया गी 5 विकटें कन्नै हराने मगरा श्रृंखला फिलहाल 1-1 दी बरोबरी पर ऐ।

<><><><><><>